

Escrito por Redaccion @valminorinfo
Luns, 01 Decembro 2014 22:54



Dende a agrupación nacionalista de Gondomar denuncian que por razóns aínda descoñecidas a Interventora e mais a Secretaria Técnica do Concello renunciaron ao tribunal cualificador encargado de realizar as probas aos postulantes para cubrir dúas prazas vacantes da Policía Local. Engaden que isto levou a unha suspensión provisional desta oposición que debía terse desenvolvido o pasado xoves 27 de novembro. Atranco que ten en vilo a 139 persoas que foran admitidas nas probas e levan meses preparándoas. Afirmen que non é a primeira vez que se producen “incidencias” nos procesos selectivos na Policía local de Gondomar, “*xa en anteriores ocasións para a escolla dos Auxiliares da Policía Local, houbo dimisións ou mesmo aspirantes aprobados con posterioridade á entrada en vigor dos contratos e cando xa se empezara a traballar*”, afirma o edil Pauliño del Río.

“*É consciente o Sr. Alcalde que unha mancha de sospeitas e desconfianzas estase estendo arredor desta oposición?*” pregunta del Río nun comunicado achegado este luns. Nese senso o concelleiro esixe que a transparencia sexa “*total*” neste asunto.

Pedido de explicacións

Sinala que ante as dúbidas que manifestan os opositantes así como o resto da veciñanza a súa agrupación solicitou que no próximo Pleno, a celebrar neste xoves, 4 de decembro, a

Escrito por Redaccion @valminorinfo
Luns, 01 Decembro 2014 22:54

comparecencia do concelleiro delegado da Policía Local ou do alcalde como Xefe de Persoal “*para que dean as explicacións pertinentes, que esperemos que sexan cribles e reais*”. Do contrario afirma que o novo tribunal que está a conformar a administración local “*quedará afectado pola sospeita máis absoluta e os principios constitucionais de igualdade, mérito e capacidade no acceso á función pública poden resultar seriamente comprometidos*”.

Renuncias no tribunal cualificador

O tribunal cualificador está integrado por 5 membros titulares e 5 suplentes. “*Todos eles funcionarios con titulación igual e superior á esixida nas prazas convocadas*”, sinala o edil del Río. Orixinalmente estaba integrado pola Interventora do Concello como Presidenta, A Técnica de Administración Xeral do Concello como secretaria e 3 vogais que son oficiais das Policía de Nigrán, Gondomar e Baiona. Todos cos seus respectivos suplentes.

Mais no BOP de 25 de novembro de 2014, publicase a Resolución da Alcaldía pola que se produce a “*suspensión do procedemento relativo á cobertura destas dúas prazas de policía local*”. Tómasse esta como unha medida provisional.

O motivo é a renuncia de 4 membros do Tribunal Cualificador, “*en concreto a Presidenta e a súa suplente e a secretaria e a súa suplente. Quedando por tanto o tribunal con so os tres vogais membros de Policía Local e os seus suplentes*”, advirte o edil nacionalista.

É agora que?

Entende del Río que debido á gravidade desta medida e das consecuencias derivadas para ás 140 persoas que levan meses preparándose para esta oposición, “*este suceso non pode quedar nunha simple paralización provisional. Alguén terá que explicar moi ben porque se produce a paralización deste proceso a dous días da celebración da primeira proba. Proba que os aspirantes levan meses cando non anos preparando. Que tipo planificación se estableceu ou mellor dito, houbo planificación?*”

Ao mesmo tempo o nacionalista afirma que preguntará aos responsables “*Que pasou en realidade para que se produciran ás renuncias da Presidenta e secretario do Tribunal e as súas suplentes?*”

“*O malestar e o desconcerto dos opositores é manifesto e de coñecemento público, mesmo á súa desconfianza neste proceso* ”, finaliza del Río.

Antecedentes

O Concello de Gondomar ten en trámite a Oferta de emprego público de dúas prazas de Policía Local. A primeira delas, segundo a información achegada por del Río, corresponde á Oferta de emprego público de 2011, foi aprobada pola Xunta de Goberno Local o 11.11.2001, publicada no BOP de Pontevedra o 26.12.2011. A segunda delas corresponde á Oferta de emprego público do ano 2013, publicada no BOP de Pontevedra de 18.07.2013. E no BOP de 26.11.2013 fíxose pública as Bases da convocatoria destas dúas prazas de Policía Local.